

15. august 2025

UKA 2025/59

Inatsisartut suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga:

Ulluunerani paaqqinnittarfinni atorfeqartut suliffigisaanni pissutsit suliffimmilu atugassarititaasut siunnersorneqarneq assigisaalluunniit aqqutigalugit qanoq ilillugit pitsanngortinneqarsinnaanersut, apeqquteqaat aallaavigalugu oqallinnissamik siunnersuut
(Inatsisartunut ilaasortaq Pipaluk Olsen, Demokraatit)

Ulluuneraniuna paaqqinnittarfinni, meeqqatta ataatsimoorinnaaneq siullertut alloriaatigisaraat. Tassanilu ineriartornerat inuunerissaarnissaallu tunngavilerneqartarluni. Naatsorsuutigisinnaanngilarpulli, pæeeqqat inuunerissaarlutillu ineriartornissaat sinnaakkutini, kissaatigisatsinni, tassunga ilutigalugu pingaartinngikkutsigu sulinerminni atugassarititaasa pitsaanissaat, taakkumi ullut tamaasa suliamik taassuminnga kivitsisuusarmata. Uani pingaartumik perorsaanermik suliaqartut ulluuneranilu paaqqinnittarfinni sulisut allat eqqarsaatigaakka.

Ulluunerani paaqqinnittarfinni sulisut atugarissaarfiusumik inuunissatsinnut siuttuupput. Meeqqat tapersersornissaannut nukittorsarnissaannullu akisussaasuupput, tassani aamma meeqqanut ilungersunartumik atugaqartunut toqqissisimananngitsumillu angerlarsimaffeqartunut. Maligassiuisuupput pingaarutilittullu isumassuisuullutik. Piffippassuarnili sulisut sulerulunermikkut aqullaartitaasarpur. Napparsimaneq pissutigalugu sulinngitsut amerliartortut tusaasarpagut, sulisut nikerartut nukissaaruttullu. Tamanna sulisunut ulluuneranilu paaqqinnittarfinnut sunniuteqaannarani, aammali meeqqanut taakkulu angajoqqaavinut sunniuteqartarpoq.

Demokraatit isumaqarput, uagut inuiaqatigiittut ileqqorissaarnikkut politikikkiknullu pisussaaffeqartugut ulluunerani paaqqinnittarfinni sulisunut atugassarititaasut pitsaasut attanneqarsinnaasullu pilersinnissaat. Pinngitsoorata pitsaanerusumik suliffimmi atugassaqaarnissaat isumagisariaqarparput.

Taamaaliornissamut ilaatigut pisariaqarpoq, siunnersuinerup – tassalu suliamut tunngasumik aqqutissiuussineq, pisimasunik eqqartueqatigiinneq tapersersuinerlu – sulinermi aalajangersimasumik ilaatinneqalissasut. Siunnersuineq sulisunut ajunngitsorsiat ilaattut isigineqartariaqanngilaq, kisiannili pisariaqartutut aalajangersimasumillu sakkussatut isigineqassalluni sulinermut atasumik inuttut ajornartorsiutitut aammalu misigissutsikkut artorsaatissinneqarnermut aqutsinnaanissamut.

Ilisimavarput, ingerlatani allani siunnersuoinernut aqqqissuussanik pilersitsisoqareersimasoq. Piffissanngorpoq, paasissallugu, perorsaanermik suliaqarneq eqqarsaqqissaanermik tapersersorneqarnermillu assiganik pisariaqartitsiviusarpat. Sulisunik piginnaasaqarluartunik sulilluartunillu



DEMOKRAATIT

peqarnissaq kissaatigigutsigu, meeqqatsinnut toqqissisimasumik ineriartuutaasumillu sinaakkusiinnaasumik peqarnissarput, allatut ajornartumik qulakkeertariaqarparput, aamma taakku isumassuineramik, tapersorsorneqarnermik siunnersueqatigiissinnaanermillu periarfissaqartinnissaat.

Tamannali aatsaat pisinnaavoq, uagut uani Inatsisartuni akisussaaffik tigugutsigu ataatsimoorlutalu ajornartusiutinut aaqqiissutaasinnaasunik nassaarluta. Tamanna tunngavigalugu isummersuutini ukununga tigusaqarnissara qilanaara:

- Qanoq ililluta qulakkeersinnaavarput, siunnersueqatigiissinnaanerup assigisaataluunniit sulianut sakkussatut ulluinnarni perorsaasunut sulisunullu allanut ulluunerani paaqqinnittarfinni aalajangersimasumik atorneqalersinnaanerat?

- Qanoq ililluta suliffimmi pissutsit pitsanngorsarsinnaavagut napparsimanerlu pissutigalugu sulinngitsoonerit ikilisarlugit?

- Politikikkut pituttorsimanngitsumik aaqqiissutini nassaarsinnaassanerpugut kommunit Namminersorlutillu Oqartussat isumaat akimorlugit, attanneqarsinnaasunik sinaakkusiinissamut sulisoqarnissamullu?

Inatsimmik allannguisaagut, sulisut inissisimanerat atugarisaakku ersaarinninngorlugit inatsimmi atoreersumi?

Demokraatit isumaqarput, suliffimmi sulisunik pitsaasumik atugaqartitsineq meeqqat inuunerissaarnissaannut, angajoqqaat sulinerannut aammalu inuiaqatigiit tamarmiusut ataqatigiinnerannut pitsaasumik aaqqiinerussasoq. Piffissanngorpoq, oqaatsit piviusunngortinnissaat, ullut tamaasa meerartatta siunissaanik suliteqartut pingartilernissaat.

Qilanaaraara tusassallugu, partiit allat Naalakkersuisullu pineqartoq qanoq isumaqarfigineraaat, pingartikkakku, ulluunerani paaqqinnittarfinni sulisunut pissutsit pitsanngorsarnissaannut suleqatigiinnissarput.